

Cancer di pancreas ta frecuente na Aruba

ORANJESTAD – Cancer di pancreas ta uno frecuente na Aruba, pero si e ta wordo detecta na tempo e pashent por wordo trata debidamente y te hasta e por scapa su bida, asina president di Koningin Wilhelmina Fonds Aruba, sra. Lilian Prince a relata na Bon Dia Aruba ayera.

Importante ta pa tur hende ta consciente di e sintomanan pa asina interpreta debidamente cualkier señal cu e curpa mes ta duna nos. Aunke cancer di pancreas ta dificil pa detecta y diagnostica na tempo.

Charla

Pa tal motibo e fundacion aki ta organisando un charla riba e topico aki. E charla cu ta totalmente gratis lo tuma lugá dia 7 di maart desde 9or mainta pa 12or na Ballroom di Alhambra. E ta conta como orador cu e specialistanan, esta Gastroenterologo, Dr. Edgar Caceres y Oncologo, Deepu Daryanani. Igualmente sr. Eugene Maduro di Departamento di Salud Publico lo realiza un presentacion riba e casonan di cancer

di pancreas detecta na Aruba.

Sra. Prince a declara na Bon Dia Aruba cu e tipo di cancer aki no tin di haber mucho cu e nutricion of forma di alimentacion. P'esey nan a dicidi di cancela e participacion di un nutricionista den e charla aki.

Esaki ta e prome charla cu WKF ta organisa riba cancer di pancrea. Considerando cu maart ta luna dedica na e cancer di tripa of stoma, nan a dicidi -cu acesorio di e specialistanan- pa realiza mas bien un charla riba e cancer di pancreas cu ta uno desconoci den su conocimiento na Aruba, pero conoci pa su efecto of malesa.

Cancer di pancreas

Cancer de pancreas ta un malesa cu ta wordo forma pa e celnan malo of canceroso den e tehidro di e pancreas. E señalnan y/of sintomanan di cancer de pancreas ta ictericia (color geel di bo cuero y slijm debi na aumento di bilirubina), dolor y perdida di peso; perdida di apetit, af di color palido, pishi color scur, sensacion di cansancio.

E pancreas ta ubica entre stoma y weso di lomba. E ta un klier di mas of menos 6 inch di largo cu forma di peer fini. E parti mas hanchu di e pancreas ta wordo yama cabes; e parti di mita ta wordo yama curpa y e parti mas fini ta wordo yama cola.

E pancreas tin dos funcion: E ta produci un substancia cu ta yuda den e proceso di digestion di cuminda den nos curpa.

E ta elabora hormona manera insulina y glucagon. Nan ta yuda pa controla e concentracion di sucro den sanger. Ambos hormona ta yuda nos curpa pa uza y warda energia obteni di e cuminda. E celnan exocrina di pancreas ta elabora e substancia digestivo, mientras cu e cel endocrina di pancreas ta elabora hormona. Aproximadamente un 95% di e cancer di pancreas ta cuminsa den e celnan exocrinas.

Riesgo

E factornan di riesgo di cancer di pancreas ta inclui: Humamento; sobre peso;



antecedente di diabetes of pancreatitis cronico; antecedente den famia di cancer de pancreas of pancreatitis.

Antecedente di salud lo por afecta e riesgo di presenta cancer di pancreas. E hecho cu e pashent tin un factor di

riesgo, esaki no kiermen cu e ta bay haya cancer.

Tampoco no presenta niun factor di riesgo, no kiermen cu e persona no ta bay haya cancer. Ta importante pa consulta bo doctor si abo ta pensa cu bo ta den riesgo. □